

QUÆSTIO MEDICA.

CARDINALITIIS DISPUTATIONIBUS
manè discutienda, in Scholis Medicorum, die Mercurii.
vigesima quartâ Martii.

M. PETRO CRESSE', Doctore
Medico, Præsede.

*An in febribus acutis initii quàm declinationis tempus purga-
tionem potiori jure sibi vindicat?*

I.

PURGATIO & sanguinis detractio insignem præ se ferunt in adversâ penè omni valetudine auxilii facultatem. Ubi victus ratio manca & debilis est, in earum usu spes posita non decipit. Si his careat chirurgia rariùs de suâ dexteritate superbiendi occasionem reperiat. Nullum medicamentum est, etiam specificum, quod utriusque illius solennioris præsidii adjutum societate, non suam virtutem cumulatiùs utiliùsque largiatur. Suo ritè loco adhibita in febrium acutarum curatione (sub quibus videlicet ægri vita plùs in periculo quàm in tuto est) mira præstant. Purgationem (vigoris quidem tempori præcipuè dedicatam), his inclinantibus omittere nihil tanti est; quam nemo rerum medicarum æstimator æquus non sperabit, si sub earum principiis turgente ex quâ prodierunt materiâ usurpetur luculenter amplissimèque profuturam.

II.

FEBRIS caracterem primarium in calore nimium evecto cum totâ antiquorum familiâ agnoscimus. Si is simplex & solitarius est, qualis plerarumque febrium est, ad eum à quo deflexit naturæ modum, nullo vel facili certè negotio revocatur. Si aliquâ notabili falsugine aspersus est, turbas mover, quidquid opis afferamus, periculi nonnumquam plenissimas. Subsunt videlicet in homine (hæc genuina Hippocratis doctrina est, sectæ verè & solidè

rationalis, empiricæ nimirum, unis intentæ causis evidentibus, vindicis generosissimi; hypotheseos obscurioris cujuslibet, quæ pauculis innixa principiis, in totâ, quanta quanta est, medicinâ, stultè præsumat dominari, qualem chymici venditant, fastidiosissimi contemptoris) amarum, acidum, acerbum, austerum, acre & mille alia saporum cœu salium discrimina, suis quæque prædita virtutibus. Hæc probè inter se mixta & mutuò contemperata, nec sensum afficiunt, nec ullatenus incommodant. Quod si horum aliqua à cæteris detorta calido se, itidem dissociato, adjunxerint, febribus acutis, pro eo quo valent robore, plùs minùsvè gravibus, & medicinæ auxilium non leve requirentibus, materiam suppeditant. Omne quod earum inclinationi antecedit tempus emendandæ illi & exigendæ falsitudini infumitur; quo elapso, ut ex symptomatum, quæ priùs sæviebant, dissipatione scire licet, vix ullus deinde superest dubitationi locus, quin natura eò usque progressa, ut morbo superior evaserit, eum sit deinceps, contempto inani propemodùm & gravante purgationis officio ad sanitatem eamque integerrimam conversura.

III.

EA rectè dicitur turgere materia, quæ evolvi impatiens oppositi obicis vim vi enititur repellere. Nisus ille vehemens sit, plurimum; turbulentus sit placidusvè, nihil interest. Hujusmodi aliquid febrium paulò graviorum exordiis semper adest; ad sanguinem frequentius, rarius ad morbi fomitem, ad utrumque unà simul nunquam pertinens. Ut vel illuc vel huc orgasmus subest; ita conatus materiæ turgescens aut venæ sectione minuendus, aut est purgatione non leviter proritandus. Febris acutæ initio (dùm scilicet nulla adhuc satis clara vel obtinendæ coctionis, vel permansturæ cruditatis signa adsunt) arteria se vehementer, crebrò, celeriter exagitet, ægri simul facies rubore multo suffusa sit, oculi micent, caput doleat, pectus æstuet, vagi intus dolores incommodent; aliæ ejusdem generis symptomata se ostendant: sic habeto; sanguinem effervesce impensius, inflari & tumultuosè turgescentem, totum in eo esse, ut valorum ductus quibus jam angustius conclusus est, vel amplificet, vel etiam dilaniet: Dùm contrà, perversis quæ hæc turbas commoverunt salibus, è nativo lare profugis, intrà vastam venarum arteriarumque aream, cum libertate summâ, hæc illæ, nullâ orgasmi molestiâ afflictatis, circumcursare licitum est. Sub casu quolibet hujusmodi, purgationis adhibendæ consilium repudiari prosùs debet, nec ullo tutius effaciusque præsidio quam sanguinis missione (iis solutâ le

gibus quas nuperus scriptor nè quid dicam gravius, paulò certè inconsideratiùs publicavit) naturam posse adjuvari recrearique sperandum est. At ineunda ratio est illi omnino diversa (quæ in variolarum etiam eruptione tardiori nonnunquam locum habet) ubi ex percussu arteriæ, quàm symptomata quæ assident prægravia videntur postulare, moderatori & in speciem *ἀνέρητος*, sanguis quidem nativis limitibus contineri facillimè, ipsa verò morbi materia, in obtinendo quem natura enixè desiderat evolutionis modulo, inaniter laborare atque adeò turgere agnoscitur. Ea tùm purgationis per superiora institutæ potenti aculeo ità gnaviter percellenda atque exagitanda est, ut placidi, at tantò nequioris, quo gravatur orgasmus vinculis expedita, partim se permittat remedio foras ejiciendam; partim, eâ sui nimirum portione quæ intùs residua futura est, naturæ exhibeat deinceps concoquendam.

I V.

NULLIUS penè rei frequentior apud medicos quàm orgasmus mi febribus acutis incipientibus, author Hippocrate, purgationem requirentis, mentio sit: haud scio an ulla alia res eorum plerisque minùs benè explorata sit. Quæ febris acutæ initio turgens in venis materia purgantis remedii facultate exagitari opus habet, tumultu nullo, nullâ fluctuatione agitur: Idem propè illius tunc status est qui fulminis, dùm nubis quâ premitur spississimæ ambitu erumpere quantumvis adnitatur nondum valet. Verbo dicam orgasmus nomine hîc intelligenda est, fermenti febrium acutarum parentis, non turbulenta & insana, qualem suprà in sanguine animadvertimus, sed taciturna quædam & modesta dispositio, sub quâ, dùm se evolvere & pro naturæ votis explicare contendit liberius; forti objecto obice, nè id obtineat, prohibetur. Hujusmodi casus certè damnosissimus, febrium affecla graviorum, præsertim malignarum, nihilo apud Græcos olim, quàm apud nos hodie, infrequentior; idoneum, si quis ullus alius, purgationi utiliter usurpandæ locum præstat; nec satis pro merito quidam medici vituperandi sunt, qui tunc morbi decessionem placidè atque oscitanter expectantes, inconsultâ hujus auxilii dilatione, viam adventanti letho vel patentissimam aperiunt.

V.

SUAM febre acutâ inclinationis ætatem decurrente, non ita quidem inanis est purgatio ut nullam omninò commoditatem afferat; verum incipiente, si modò orgasmus adest ei ferendæ accom-

modus ægros quasi ab orco in lucem reduces facit sæpissimè. Illè id curat tantummodò , ut minùs bellè adhuc procedentis chyloseos sordidatiores exuviz plenius abigantur , hìc ipsissimam morbi causam sanguinis , ut ita dicam , visceribus etiamnùn inhaerentem , fronte adversâ adoritur , extorquet & administ'ro succi cujusvis obvii vehiculo (scatemus autem innumeris) eliminat. Quam in febre quâlibet assiduâ tempus declinationis assequutâ alvi dejectiones materiam sufficiunt , cave eam esse existimes à quâ illa dimanavit & undè tora quæ priùs acta est processit tragædia ; subacta ope mixtionis & concocta , vel jam propè omnis abierat , ubi primùm morbus , cùm quâdam visus est constantiâ mitescere ; nec quidquam tunc desidendo egeritur , longiùs quàm à ventriculo arcessitum , quod in dies elaboratius naturæ sensim revalescentis signum , haud ullam nisi fortè levissimam & pro nihilo reputandam causæ morbidaë portionem secum portat. Ibi quiescere & supervacuas purgationis molestias devitare valdè licet. At sub principiis orgasmo , non fictitio , sed ab evidèntissimâ rei ipsius naturâ repetitò , qualem proposui , sæviente : Ea protinùs vel cùm quâdam interdùm temeritate rapienda est ; nè vera morbi materia , succutientis illius præst'lii beneficio destituta , aut evolvi non possit ullo modo , quâ calamitate in acutis febribus nulla major ; aut vidtrix propositi , effusiusque desubitò explicata , alicui ex iis partibus quarum integritate sustinemur , tumultuosâ & turgidâ sanguinis effervescentiâ ministrante , inflammationem accersat , nullâ sæpè artis nostræ operâ quantumlibet vehemente domabilem. Hanc doctrinam monstrat experientia , defendit ratio , tutatur , quem hìc valdè sequi studuimus authorem , Hippocrates. Nusquam ille de purgatione sub febrium acutarum finibus usurpandâ sollicitus , in libro aphorismorum , verbis jubet conceptissimis , cogit atque imperat , ut iis incipientibus (si modò turgeat undè enatae sunt materia) quamprimùm & sine ullâ procrastinatione celebretur.

Ergo in febribus acutis initii quàm declinationis tempus purgationem potiori jure sibi vindicat.

Proponēbat Parisiis LUDOVICUS DEMONDIERS DUGUÉ ,
Parisiinus , Baccalaureus Medicus. A. R. S. H. 1700.